

Segun Robertico Croes:

Justicia: Aruba ta entrega loke otronan ta muri pe

ORANJESTAD(AAN)- Dr. Koos Veel a ricibi Diasabra cu a pasa un orden den nomber di Ministro Hendrik Croes cu e mester bandona Aruba denter di 3 siman. E orden aki a worde duna apesar cu tin un sentencia di Huez cu ta prohibi tal decision.

Dr. Koos Veel ta Director di Aloe Balm cu ta un compania di lider di Partido di Pueblo Arubano, A.V.P.

Segun miembro di Parlamento Tico Croes, no solamente e orden aki ta un reflejo di e maneho di odio y venganza di parti di e gobierno actual, pero ta otro ehempel mas di e desaroyo peligroso cu nos ta den actualmente, esta di pone sentencianan di Huez un banda.

"Hendenan di añanan 1989" nan a worde yama pa Newsweek. Nan ta e pueblonan di paisnan na Europa Oriental, cu ta lanta contra regimennan di nan pais. Cu riesgo di perde nan bida, nan ta sali dilanti pa e libertad real; pa justicia por worde haci nan pais y cada uno di su

ciudadanonan. Ora scucha y leza kico e paisnan na Europa Oriental ta pasa aden pa recobra loke ta realmente Libertad, hancra den e sentido di Justicia pa tur ciudadano, y ora pone banda di dje loke ta pasa y informenan en cuanto desaroyonan di Aruba, nos mester puntra si aki nos ta bay entrega, loke otronan ta muri pe.

Sr. Croes a sigui bisa nomber di cuanto oponente politico y persona, cu no ta worde simpatisa directamente pa gobernantenan, a worde lastra den lodo durante e ultimo año? Te awor tin prueba pa loke a worde uza como arma contra e personanan aki? Pero no ta berdad, cu un caminda nan a keda mancha unabaz a mishi cu nan nomber y reputacion?

Kende ta esnan cu actualmente ta haya posicionnan importante, trabao, y tur loke un gobernacion por duna, hasta te na un extremo? Kico a socede cu instancianan, manera comercio, y nan representantenan cu a habri boca y bisa cu nan no ta di acuerdo cu cierto decisionnan gubernamen-

tal? Con a lanza campananan pisa contra nan, mientras ora tabata trata di instancianan, cu por a significa beneficio politico, no kier a tende nada malo?

Kico a pasa cu Ben Wilms na Hulanda? Acaso no ta e gobernantenan di awe a dicidi na 1985 cu e ta "the right man on the right place" na Hulanda, pasobra e tempo e tabata bon amigo? No ta asina cu Juez den sentencia a mostra cu wega a worde hunga contra Ben Wilms?

Kico a pasa cu doctor Hermans? E mester paga pasobra el a traha su trabao cu consenshi y a bati alarma ora loke no ta permisible tabata haya sosten? Kico a pasa cu Fiscal Van Wijland? Su nomber no a worde basha abao ora a tuma pasonan arbitrario contra dje? Si acaso Ministro di Justicia tabata tin poder pa a mishi cu contenido di trabao di Van Wijland, pakico despues el a hala tras y a laga na e Fiscal Mayor, Werleman-Lejuéz pa implementa mes orden?

Kico a pasa cu Harbour Town? Con por ta cu un decision di Juez ta worde poni un banda sin mas pa Gobierno, cu mester duna e bon ehemplo di ta obedece leynan?

Segun Sr. Croes esaki ta easonan, cu ta sali dilanti. Pero tin hopi caso mas. Casonan, di personanan cu ta sinti cu nan ta worde perhudica y mester acerca Juez pa siquiera trata di haya razon. Pasobra nan no tin e seguridad, cu e sentencia di Juez lo yuda, como cu sucesonan manera Harbour Town y awor e Director di Aloe Balm ta demostra cu Gobierno por ignorar Juez tambe.

Mientras Aruba ta pensa y ta trata di analiza desaroyonan, na Hulanda voz di un ex Ministro ta rezona den Parlamento pa lanza acusacionnan sumamente pisa ariba desaroyonan den mudo di Justicia na Aruba y hasta ta acusa ministro di Justicia di a laga un traficante di droga den libertad. Den mes rosea, sosten ta worde duna na cambio den e pensamiento Hulandes enfrente Independencia di Aruba. Hulanda tin miedo cu despues di Independencia Pueblo di Aruba lo worde hinca den dictadura?

Justicia: nos lo entrega loke otronan ta muri pe? Sr. Croes a puntra. Tin hende cu ainda no a worde confronta cu e accionnan pisa di Injusticia. Pesey nan no sa kico ta significa ora trampa ta worde traha pa hende inocente. Nan no sa kico ta sufrimento di un inocente, cu mester paga pa algo cu e no a comete. Nan no sa kico kiermeen biba marca y persigui pasobra bo ta mantene cierto opinion. Nos ta uno di esnan cu a sinti caba kico kiermeen: Busca palo pa dal cacho! Nos sa cu lo sigui busca palo pa dal cacho, pa asina tambe loke mester keda exponi keda cubri, sr. Croes a sigui bisa.

Con lo ta cu Aruba ora paisnan cu awe ta bida den gara di regimennan dictatoriales logra caba cu opresion y Justicia, e alma di libertad, lo bira nan suerte atrobe? Esey nos no por bisa. Esey ta keda na Aruba. Ta keda na consenshi di esnan cu

awor ta beneficia y mester dicidi si nan kier mira realidad, poniendo un banda nan beneficio personal of no. Ta keda na cada ciudadano pa dicidi kico lo pasa cu Justicia na Aruba y si nos ta bay entrega, loke otronan ta muri pa haya!

Pasobra ora Rumania etc. a grita Libertad, nan no tabata kiermeen Libertad pa un grupito por haya oportunidad pa haci y deshaci. Nan libertad tabata kiermeen: Justicia, cu por worde uza pa libera o oprimi!

Por nota con constantemente represaya politico ta worde tuma contra tur hende, cu segun Gobierno no ta comparti nan opinion politico. Sr. Croes a bisa cu e ta sigur cu esnan cu no kier bay na amen di Ministro Croes, mester warda nan culpa.

Ministro di Justicia a duna orden pa Koos Veel bandona Aruba. Kende ta sigui? Loke nos sa ta, cu na Aruba nungun hende por biba sigur mas. Ta solamente si publicamente bo ta cu MEP, o su invitadonan ADN y PPN, bo ta scapa.

Esey kiermeen cu tur e 13 Mil votadornan di AVP y hasta hendenan cu awe ta cu MEP, pero despues por cambia nan opinion, mester bay biba den exterior pasobra na nan pais no tin lugar pa nan mas? Roly Croeze, cu a gana un caso contra Gobierno algun siman pasa, por bisa kico kiermeen ora cu Gobierno ta contra bo. Merries, cu a sostene ADN semper, awe tambe mester sinti kico kier meen "ta nos ta manda".

Mientras dictaduranan na tur parti di mundo ta desaparece, na Aruba tin un Gobierno y un Ministro di Justicia, cu ta sigui introduci, cu un afan increible, un dictadura cu nos no kier conoce aki hamas, Sr. Croes a enfatiza.

Na final Sr. Croes a bisa cu awor aki ta nos tur mester para contra e amenaza serio aki di e Gobierno di MEP, ADN y PPA, cu kier impone nan dictadura ariba nos. Awor nos mester muestra nos amor pa libertad, promer cu ta mucho laat. E nacion Aruba ta na peligro.